

МЕСЯЦА ИУНИА В 19-Й ДЕНЬ.

СВЯТАГО АПОСТОЛА ИУДЫ, БРАТА ГОСПОДНЯ

На вечерни поем Блажен муж: 1-й антифон.

На Господи, воззвах: стихиры на 8, глас 1.

Подобен: Всехвальнии мученицы:

Иудо всехвальне * твое вещание изыде, * якоже молния, в концы вся земля, мудре, * помраченныя лестию безбожия, * к Свету наставляя невечернему, * имже ныне сияя, * испроси душам нашим велию милость.

Иудо чудный, * Христова колесница яко быв, * идольскую гордыню низложил еси, * плен же тайно Словом Божиим пленил еси * к жизни нетленной, славне, * еюже наслаждаяся ныне, * испроси душам нашим мир и велию милость.

Иудо, апостоле Христов, * ученик быв воплощагося Бога нашего, * от Негоже, яко овча посреде волков, * воистинну послался еси, * словом твоим сих претворяя злочестие ко благочестию * и Божественному разумению Святыя Троицы. * Темже восхваляем тя.

Слава, глас 8:

Иже Божественнаго Духа ясно благодать прием, * священнаго лика апостольска сопричастник быв, Иудо апостоле, * тем носимое с Небесе иногда дыхание огненное * огненным языком вдохнув, * языческое терновое попалил еси безбожие. * Христа Бога, проповедниче, моли * спастися душам нашим.

И ныне: Царь Небесный:

Вход. Прокимен дне. И чтения три.

Соборнаго Послания Иудина чтение (глава 1):

Иуда, Иисусу Христу раб, брат же Иакову, сущим о Бозе Отце освященным, Иисус Христом соблюденным званым: милость вам, и мир, и любви да умножится. Возлюбленнии, всяко тщание творя писати вам о общем спасении вашем, нужда ми бысть писати вам, моля подвизатися о преданней вере святым единою. Привидоша бо нещии человецы, [древле предустановленнии на сие осуждение,] нечестивии, Бога нашего благодать прелагающии в скверну и единого Владыки Бога и Господа нашего Иисуса Христа отметающиися. Воспомянуги же вам хошу, ведущим и вам единою сие, яко Господь люди от земли Египетския спасе, последи неверовавшия погуби. Ангелы соблюдшия своего начальства, но оставльшия свое жилище, на суд великаго дне узамы вечными под мраком соблюде. Якоже Содомы и Гоморры и окрестныя их грады, подобным их образом преблудивша и ходивша в след плоти инья, предлежат в показание, огня вечнаго суд подъемше. Такожде убо и сии, сония видяще, плоть убо сквернят, господства же отметаються, славы же хуляще [не трепещут]. Михаил же Архангел, егда, со диаволом разсуждая, глаголаше о Моисеове телеси, не смеяше суда навести хульна, но рече: да запретит тебе Господь. Сии же, елика убо не ведут, хулят: елика же по естеству, яко безсловесная животная, ведут, в сих скверняются.

Соборнаго Послания Иудина чтение (глава 1):

Горе им, яко в путь Каинов ходиша, и в лесь Валаамовы мзды пролияшася, и в пререкании Корреове погибоша. Сии суть в любвах ваших сквернители, с вами ядуше, без боязни себе пасуше, облацы безводни, от ветр преносими, дресеса есенна безплодна, дважды умерша, искоренена. Волны свирепыя моря, воспеняюще своя стыдения, звезды прелестныя, имже мрак тьмы во веки блюдется. Пророчествова же и о сих седмый от Адама Енох, глаголя: се приидет Господь во тьмах святых [Ангел] Своих сотворити суд о всех и изблечити всех нечестивых о всех делех нечестия их, имиже нечестоваша, и о всех жестоких словесех их, яже глаголаша нань грешницы нечестивии. Сии суть ропотницы, укорители, часть порочна, в похотех своих ходяще, нечестием и законопреступлением, и уста их глаголют прегордая, чудящеся лицам пользы ради.

Соборнаго Послания Иудина чтение (глава 1):

Вы же, возлюбленнии, поминайте глаголы, преждереченныя от апостол Господа нашего Иисуса Христа. Зане глаголаху вам, яко в последнее время будут ругатели, по своих похотех ходяще и нечестиих. Сии суть отделяюще себе от единости веры и суть телесни, Духа не имущи. Вы же, возлюбленнии, святою вашею верою назидаяще себе, Духом Святым, и молящеся, сами себе в любви Божией соблюдайте, ждущи милости Господа нашего Иисуса Христа, в жизнь вечную. И овех убо милуйте, разсуждаяще, овех же страхом спасайте, от огня восхищаяще. Обличайте же с боязнию, ненавидяще и яже от плоти оскверненую ризу. Могущему же сохранить вы без греха и без скверны и поставити пред славою Своею непорочны в радости, Единому премудрому Богу и Спасу нашему [Иисусом Христом Господем нашим] слава и величие, держава и власть прежде всего века, и ныне, и во вся веки, аминь.

На стиховне стихиры, глас 4.

Подобен: Дал еси знамение:

Прият еси, апостоле, * над демоны непобедимую власть и силу * и о имени Христове начала тьмы отгонити, * прошел еси землю, просвещая, яко солнце, * и вся страны научая, * и первое, славне, Христово проповедал еси * спасительное пришествие.

Стих: Во всю землю изыде вещание их * и в концы вселенныя глаголы их.

Первей благости * и естественному и пребожественному житию подобяся, * муж был еси благ, Иудо, по существу, * и брат Господень именуемь, * нрава твоего благодатию * и обычая красотою, * Христов показался еси ученик искренний.

Стих: Небеса поведают славу Божию, * творение же руку Его возвещает твердь.

Орган, добре составлен, * Божественным окормлением, * апостоле Иудо, * языком званию ты вверился еси, * к познанию Христову наставляя словесы и деянии, * вся просветил еси * исповедати истинное Иисуса Божество, * Спаса душ наших.

Слава, глас 2:

Ревности Божественныя исполнен, * апостоле Иудо досточудне, * ревнуя, поревновал еси Богу Вседержителю, * и Божественных тя чудес исполнена показа, * странную бо ревность имея, * действием нрав стяжал еси. * Темже Вышний сый, с

Вышними лики вселяемъ, * молися, Боговидче, Слову, Христу Богу нашему, * даровати нам велию милость.

И ныне, Богородичен: О, чудесе новаго:

Тропарь, глас 1:

Христова тя сродника, о Иудо, ведуще и мученика тверда, * священо восхваляем, прелесть поправша и веру соблюдша. * Темже, днесь всевятую твою память празднующе, * грехов разрешение молитвами твоими приемлем.

Ин тропарь, глас тойже:

Чистоту душевную и житие непорочно стяжав, * Пречистаго Света, нам приближшагося, быв по плоти брат и ученик, * благочестия проповедник и языком учитель истинный, * Иудо всехвальне, * моли Христа Бога, * да спасет души наша.

НА УТРЕНИ

На Бог Господь: тропарь апостола, глас 1:

Христова ты сродника, о Иудо, ведуще и мученика тверда, * священо восхваляем, прелесть поправша и веру соблюдша. * Темже, днесь всевятую твою память празднующе, * грехов разрешение молитвами твоими приемлем. [Дважды.]

Слава, и ныне, Богородичен: глас 1:

Гавриилу вещавшу Тебе Дево, радуйся, * со гласом воплощашеся всех Владыка, * в Тебе Святем Кивоте, * якоже рече праведный Давид: * явилася еси ширшая небес, * поносивши Зиждителя Твоего. * Слава Всельшемуся в Тя: * слава Прошедшему из Тебе: * слава Свободившему нас Рождеством Твоим.

По 1-й кафизме седален, глас 2:

Уловив языки апостол славный * и научив концы земныя Тебе кланяться со Отцем и Духом, Христе Боже, * того ради утверди Церковь Твою * и верным низпосли благословение Твое, * едине Милостиве и Человеколюбче.

Слава, и ныне, Богородичен:

Божественнаго естества общницы быхом Тобою, Богородице Приснодево: * Бога бо нам воплощенна родила еси. * Темже Тя по долгу вси благочестно величаем.

По 2-й кафизме седален, глас 4:

Лучу, яко солнце, правды испусти ты Христос * просветити всю землю, апостоле славный Иудо: * Божественными твоими молитвами озаряеши * и Божественным светом невечерним всех просвещаеши, * верою совершающих святую память твою.

Слава, и ныне, Богородичен:

Упование непостыдное надеющихся на Тя, * едина, рождающая паче естества плотию Христа, Бога нашего, * Того со святыми апостолы моли подати вселенней очищение прегрешений * и всем нам прежде конца жития исправление.

По полиелеи седален, глас 8.

Подобен: Премудрости:

Мрежею слова возвед из глубины неразумия боголепно, языки привел еси верою * и, яко источник сый вод духовных, вселенную всю напоил еси благодатию. * Темже и спасшиися тобою, Богогласе, * яко друга ты ближняго Христова ублажаем, апостоле Иудо, вопиюще ти: * моли Христа Бога согрешений оставление даровати * чтущим любовию святую память твою.

Слава, и ныне, Богородичен:

Небесная поют Тя, Благодатная, Мати Безневестная, * и мы славословим неизследованное Твое рождество, Богородице, * моли спастися душам нашим.

Степенна, 1-й антифон 4-го гласа.

Прокимен, глас 4: Во всю землю изыде вещание их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

Евангелие от Иоанна, зачало 67.

Во время оно, явился Иисус учеником Своим, востав от мертвых. И глагола Симону Петру: Симоне Ионин, любиши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. Глагола ему паки второе: Симоне Ионин, любиши ли Мя? Глагола ему: ей, Господи, Ты веси, яко люблю Тя. Глагола ему: паси овцы Моя. Глагола ему третье: Симоне Ионин, любиши ли Мя? Оскорбе же Петр, яко рече ему третье, любиши ли Мя; и глагола Ему: Господи, Ты вся веси, Ты веси, яко люблю Тя. Глагола ему Иисус: паси овцы Моя. Аминь, аминь, глаголю тебе, егда бе юн, поясахся сам, и хождаше, аможе хотяше, егда же состареешися и воздежеш руце твои, и ин тя пояшет, и ведет, аможе не хочеш. Сие же рече, назнаменуя, коею смертию прославит Бога. И сия рек, глагола ему: иди по Мне. Обращься же Петр, виде ученика, егоже любляше Иисус, во след идуща, иже и возлеже на вечери на перси Его, и рече: Господи, кто есть предай Тя? Сего видев Петр, глагола Иисусови: Господи, сей же что? Глагола ему Иисус: аще хочу, да той пребывает, дондеже прииду, что к тебе? Ты по Мне гряди. Изыде же слово се в братию, яко ученик той не умрет, и не рече ему Иисус, яко не умрет, но аще хочу тому пребывать, дондеже прииду, что к тебе? Сей есть ученик свидетельствующий о сих, иже и написа сия, и вем, яко истинно есть свидетельство его. Суть же и ина многа, яже сотвори Иисус, яже аще по единому писана бывают, ни самому мноу всему миру вместити пишемых книг. Аминь.

По 50-м псалме стихира, глас 1:

Во всю землю изыде твое спасительное вещание, * Боговидче апостоле, * и просвети души заблуждшия, * и Христу приведе человеки, просвещенныя благодатию. * Темже моли даровати душам нашим * мир и велию милость.

Канон Богородицы со ирмосом на 6 и апостола на 8, егоже краегранесие: Пети Иуду Боговидца тшуся. **Творение Феофаново, глас 5.**

Песнь 1

Ирмос: Коня и всадника в море Чермное, * сокрушай брани мышцею высокою * Христос истрясе, Израиля же спасе, * победную песнь поюща.

Таинниче Небесных, Иудо всемудре, учениче Спасов и общниче истинныя жизни, язык мой подвигни и слово управи на пение твое, всеблаженне.

Влекий Спасов ярем, апостоле, и бразду секий, и обновляя благодатию, семя сеял еси и мног плод принесл еси призвавшему, преславне.

Слова воплощагося обрет Учителя и Сего, Боговидче, лучами просвещаемь, был еси свет вторый, перваго сияньми сообразуяся, досточудне.

Богородичен: Вера да поведуется токмо, а не сказание, еже паче ума чудес, Богородительнице Пречистая, Непостижимаго Бога Слова родила еси, оболчена в человечество.

Катавасия по уставу.

Песнь 3

Ирмос: Водрузивый на ничесомже землю повелением Твоим * и повесивый неодолимо тяготеющую * на недвижимем, Христе, камени заповедей Твоих, * Церковь Твою утверди, едине Блаже и Человеколюбче.

Взятся ученик Христовых благолепие превыше всякаго величества: сии бо быша Ему друзи же и свойственнии, и сродницы, и соснедницы, и таин сказатели.

Иудо, братия твоя тя похваляют, брата явльшася и непщума явльшагося плотию Слова Превечнаго, от Присносущнаго возсиявшаго, от нерождена Родителя.

Умртив на земли твоя уды, пожил еси с жизнью всех Христа, пребогате, и живоносная жизни всей вселенной провозвестник ты был еси, глаголы животныя проповедавая.

Богородичен: Се Ты паче всех, Чистая, ублажилася еси, превозшла еси всех святостию, всех превознеслася еси и всех явилася вышши Небесных сил, Мати Божия бывши.

Кондак, глас 2.

Подобен: Вышних ища:

Павлу явлься собеседник, апостоле, * с сим нам проповедь возвестил еси Божественныя благодати, * тайноглагольниче Иудо блаженне. * Сего ради вопием ти: * не престай моляся о всех нас.

Седален, глас 8.

Подобен: Премудрости:

Рождашася Владыки и брата бывша всем избранным, Иудо блаженне, брат был еси * и от Него апостол во вся концы послался еси, премудре, * слово веры всем всевая и просвещая во тьме неведения работающая лукавому миродержцу. * Сего ради вопием ти: * моли Христа Бога грехов оставление даровати * чтущим любовию святую память твою.

Слава, и ныне, праздника или Богородичен:

Яко Всенепорочная Невесто Творцу, яко Неискусомужная Мати Избавителю, * приятелище яко сущи Утешителя, Препетая, * беззаконию мя суща скверное обителище и бесом игралище в разуме бывша, * потщися от тех злодейства мя избавити * и светлое жилище добродетелей соверши, Светоносная Нетленная, * отжени облак страстей и Вышняго причастия сподоби * и Света невечерняго молитвами Твоими.

Песнь 4

Ирмос: Божественное Твое разумев истощание прозорливо, * Аввакум, Христе, со трепетом вопияше Тебе: * во спасение людей Твоих * спасти помазанья Твоя пришел еси.

Великий Спасов апостол явления Духа сподоблен и возлюблен бысть, зрения Его зарю и доброту виде.

Благодати сый исполнен и даров, от Бога поданных, апостоле, на спасительное пристанище ты песнословящия наставляя.

Силою непобедимую Духа Пресвятаго ограждаемь, служителю неизреченных, лукавствия отгоняещи духи словом благодати.

Богородичен: Несказанно заченши, Всенепорочная, Творца Твоего и Бога, моли спасти ны от бед и душевное спасение подати поющим Тя, Владычице.

Песнь 5

Ирмос: Одейся светом, яко ризою, * к Тебе утренюю и Тебе зову: * душу мою просвети омраченную, Христе, * яко един Благоутробен.

Закон оставль сени, истины образ светло проповедал еси, самую истину стяжав наставника.

Слова повеление исполняя, апостоле, языки вся, учении твоими научая, обтекл еси, и сих крестя Троическим призыванием.

Дождь небесный, яко роса свыше, Божественное вещание твое, Богопроповедниче, мглу разори многобожия единого Бога проповеданием.

Богородичен: Умертви страсти моя, Богородительнице, и душу мою, умерщвленную греховными сладьми, возстави, Мати истинного Воскресения.

Песнь 6

Ирмос: Неистовствующея бурю душегубною, * Владыко Христе, страстей море укроти * и от тли возведи мя, * яко Благоутробен.

Видения учением, жития деяньми светло, Христов апостоле, сияя, сущия во глубине неведения просветил еси.

Посылаеши всем человеком светлое и учения Духа исполнено послание, священноявленне пречудне.

Боговидец вещает Небесная, якоже словесную некую Божию славу поведавая нас ради плотию Явльшагося и чудеса.

Богородичен: Пресвятая Владычице Богомати, избави мя тли и страстей смущение утоли, источник безстрастия рождающая.

Кондак, глас 2.

Подобен: Твердыя:

Твердым умом избран ученик ты явился еси * и столп неборим Церкви Христовы, * языком проповедал еси слово Христово, * веровати глаголя во Единое Божество; * от Негоже прославився, приял еси дар исцелений, * целити недуги притекающих к тебе, * апостоле Иудо всехваляне.

Икос: Истинного благочестия проповедника и державного истины поборника достойно восхвалим, * яко подобника Христу и свидетеля: * страсти бо Его на теле мужески прият, * яко ученик Словесе и апостол, Иудо всехваляный.

Песнь 7

Ирмос: Превозносимый отцев Господь * пламень угаси, отроки ороси, * согласно поюция: * Боже, благословен еси.

Боговидна ссущием Божества бывша, вси Иуду воспоем, согласно поюще: Боже, благословен еси.

Духодвижимый и Богодухновенный язык твой мир обрати Христовым проповеданием, Емуже вси поем: Боже, благословен еси.

Дает тебе Небесное наследие Господь и престол пресветел, на немже почивая, божественно поеши: Боже, благословен еси.

Богородичен: Усты и разумом Тя Богородицу Владычицу проповедуем, веселящися: Бога бо родила еси, Емуже вси поем: Боже, благословен еси.

Песнь 8

Ирмос: Тебе, Вседетелю, * в пещи отроцы, всемирный лик сплетше, пояху * дела всякая, Господа пойте * и превозносите во вся веки.

Богатство язык и царей почесть, благозвание восприял еси, вопия, апостоле: вся дела Господня, Господа пойте и превозносите во вся веки.

Всю зарю Утешителеву, блаженне, приял еси сошедшую, зовый, славне: вся дела Господня, Господа пойте и превозносите во вся веки.

Вещи тленные возненавидев, Небесных славу производил еси, пребывающую ведый, апостоле, темже вопиял еси: вся дела Господня, Господа пойте и превозносите во вся веки.

Богородичен: Приидите, доброту Иаковлю воспоим, Марию Пречистую, согласно поюще: вся дела Господня, Господа пойте и превозносите во вся веки.

Песнь 9

Ирмос: Исаие, ликуй: * Дева име во чреве * и роди Сына Еммануила, * Бога же и Человека, Восток имя Ему, * Егоже величающе, Деву ублажаем.

Облистався, славне, светолитий Духа зарею, чудес блистания паче естества всем испущаеши, яко ученик Еммануилев, Егоже величающе, тя, Боговидче, ублажаем.

Со Ангельскими чинми предстояще, боговиднии самовидцы и зрители Единороднаго, плотию обнищавшаго нас ради, Сего прилежно ныне молитесь спасти души наша.

Богородичен: Яко рождаши, Пречистая, твари Содетеля, по всему Родителя носиши начало, несравнительно имея превзятие и превознесенно. Темже Рождеству Твоему поклоняющися, Тя прославляем.

Светилен.

Подобен: Духом во святилищи:

Течение красных твоих ног, Иудо апостоле, возвратив к шествию Небесному, * возшел еси, радуяся, * и, Троице представ, во Отце видиши Сына и Духа Божественнаго. * Сего ради верою пресвященную твою и Божественную празднуем память.

Слава, и ныне, Богородичен:

Страшнаго испытания воспоминаю час, * множество злых дел моих ужасает и устрашает мя, * но ущедри, Пречистая, теплою Твоею молитвою и даждь ми спасение: * елика бо хоцещи, можещи.

На хвалитех стихиры на 4, глас 5.

Подобен: Преподобне отче:

Мановением Божественным повинуюся, преблаженне, * воплощенное Слово всем проповедал еси, * нам уподобльшася без преложения, * Сего быв честен ученик, * Сему быв брат по плоти, * Того славы сподоблься, * яко чист, зрети Божественным умом. * Темже почитаем тя, Иудо Богогласе, * и память твою совершаем, верно вопиюще ти: * Христа моли всегда * даровати вселенней единомыслие, * мир и велию милость. [Дважды.]

Гору, искапающую сладость Божественного разума, * апостоле Иудо, ты именуем; * мирную реку, устремившуюся от духовных невещественных источников, * и безбожия изсушающую моря, * и напояющую тайно благочестивых сердца и помышления; * трубу dobroгласну, гласящую Слова Божественное явление, * мир избавляющая. * Егоже ныне моли, Емуже помолися всегда * даровати вселенней единомыслие, * мир и велию милость.

Блаженне Иудо, * братия твоя ты восхвалиша, * Божия брата явльшася * и бывша Духа приятелище боголепно. * Егоже светлостми чисто просвещся, * уголь явился еси, леть попадая, * верныя же вся просвещая чистых учений сияньми. * Темже почитаем ты, * яко незаходимую денницу, * и совершаем твою память святую, * верно вопиюще ти: * Христа моли всегда даровати вселенней единомыслие, * мир и велию милость.

Слава, глас 2

Оставив земная, * последовал еси Христу * и, знаменався дохновением Святаго Духа, * послан быв от Него в языки погибшия * обращати человеки во свет Богоразумия, * апостоле Иудо, * и, скончав подвиги Божественныя твоя страсти * и мук различных, * душу твою Христу предал еси. * Того моли, всеблаженне, * даровати нам велию милость.

И ныне: Спаси от бед:

Славословие великое. И отпуст.

НА ЛИТУРГИИ

Блаженны апостола, песни 3-я и 6-я.

Взятся ученик Христовых благолепие превыше всякаго величества: сии бо быша Ему друзи же и свойственнии, и сродницы, и соснедницы, и таин сказатели.
[Дважды.]

Иудо, братия твоя тя похваляют, брата явльшася и нещцема явльшагося плотию Слова Превечнаго, от Присносущнаго возсиявшаго, от нерождена Родителя.

Умертвив на земли твоя уды, пожил еси с жизнью всех Христа, пребогате, и живоносныя жизни всей вселенней провозвестник ты был еси, глаголы животныя проповедаея.

Видения учением, жития деяньми светло, Христов апостоле, сияя, сущия во глубине неведения просветил еси.

Посылаеши всем человеком светлое и учения Духа исполнено послание, священноявленне пречудне.

Слава: **Б**огоvideц вещает Небесная, якоже словесную некую Божию славу поведаея нас ради плотию Явльшагося и чудесы.

И ныне: Богородичен: **П**ресвятая Владычице Богомати, избави мя тли и страстей смущение утоли, источник безстрастия рождающая.

Тропарь апостола, глас 1:

Христова ты сродника, о Иудо, ведуще и мученика тверда, * священно восхваляем, прелесть поправша и веру соблюдоша. * Темже, днесь всевятую твою память празднующе, * грехов разрешение молитвами твоими приемлем.

Ин тропарь апостола, глас 1:

Чистоту душевную и житие непорочно стяжав, * Пречистаго Света, нам приближшагося, быв по плоти брат и ученик, * благочестия проповедник и языком учитель истинный, * Иудо всехвальне, * моли Христа Бога, * да спасет души наша.

Кондак апостола, глас 2.

Твердым умом избран ученик ты явился еси * и столп неборим Церкви Христовы, * языком проповедал еси слово Христово, * веровати глаголя во Едино Божество; * от Негоже прославився, приял еси дар исцелений, * целити недуги притекающих к тебе, * апостоле Иудо всехвальне.

Ин Кондак апостола, глас 2.

Павлу явлься собеседник, апостоле, * с сим нам проповедь возвестил еси Божественныя благодати, * тайноглагольниче Иудо блаженне. * Сего ради вопием ти: * не престай моляся о всех нас.

Прокимен глас 8: Во всю землю изыде вещание их * и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Апостол в послании Иудином, зачало 77.

Иуда, Иисусу Христу раб, брат же Иакову, сушим о Бозе Отце освященным, Иисус Христом соблюденным званным: милость вам, и мир, и любви да умножится. Возлюбленнии, всяко тщание творя писати вам о общем спасении вашем, нужда ми бысть писати вам, моля подвизатися о преданней вере святым единою. Привидоша бо нещии человецы, древле предустановленнии на сие осуждение, нечестивии, Бога нашего благодать прелагающии в скверну, и единого Владыки Бога и Господа нашего Иисуса Христа отметающиися. Воспомянути же вам хощу, ведущим и вам единою сие, яко Господь люди от земли Египетския спасе, последи неверовавшия погуби. Ангелы же не соблюдшия своего начальства, но оставльшия свое жилище, на суд великаго дне, узами вечными под мраком соблюде. Якоже Содомы и Гоморры и окрестныя их грады, подобным их образом преблудивша и ходивша в след плоти иныя, предлежат в показание, огня вечнаго суд подъемше. Такожде убо и сии, сония видяще плоть убо сквернят, господства же отметаються, славы же хуляще не трепещут. Михаил же Архангел егда со диаволом разсуждая глаголаше о Моисеове телеси, не смеяше суда навести хульна, но рече: да запретит тебе Господь. Сии же, елика убо не ведут, хулят: елика же по естеству, яко безсловесная животная ведут, в сих скверняются.

Аллилуия, глас 1: Исповедят Небеса чудеса Твоя, Господи.

Евангелие от Иоанна, зачало 48.

Рече Господь Своим учеником: глаголы, яже Аз глаголю вам, о Себе не глаголю, Отец же во Мне пребываяй, Той творит дела, веруйте Мне, яко Аз во Отце, и Отец во Мне. Аще ли же ни, за та дела веру имите Ми. Аминь, аминь глаголю вам, веруяй в Мя, дела, яже Аз творю, и той сотворит, и больша сих сотворит, яко Аз ко Отцу Моему гряду. И еже аще что просите от Отца во имя Мое, то сотворю, да прославится Отец в Сыне, и аще чесо просите во имя Мое, Аз сотворю. Аще любите Мя, заповеди Моя соблюдайте, и Аз умолю Отца, и иного Утешителя даст вам, да будет с вами в век, Дух истины, Егоже мир не может прияти, яко не видит Его, ниже знает Его, вы же знаете Его, яко в вас пребывает и в вас будет. Не оставлю вас сиры, прииду к вам. Еще мало, и мир ктому не увидит Мене, вы же увидите Мя, яко Аз живу, и вы живи будете, в той день уразумеете вы, яко Аз во Отце Моем, и вы во Мне, и Аз в вас. Имеяй заповеди Моя и соблюдаяй их, той есть любяй Мя, а любяй Мя возлюблен будет Отцем Моим, и Аз возлюблю его и явлюся ему Сам.

Причастен: Во всю землю изыде вещание их и в концы вселенныя глаголы их.

СВЯТОЙ АПОСТОЛ ИУДА

Святой апостол Иуда, из числа 12-ти учеников Христовых, происходил из рода царя Давида и Соломона, был сыном праведного Иосифа Обручника от его первой жены.

Святой апостол Иоанн Богослов в своем Евангелии пишет: «Ни братья бо Его вероваху в него» (Ин. 7:5). Святитель Феофилакт, архиепископ Болгарский, объясняет эти слова так: в начале земного служения Господа Иисуса Христа сыновья Иосифа, в том числе и Иуда, не верили в Его Божественную сущность. Предание указывает, что, когда праведный Иосиф Обручник, возвратившись из Египта, стал делить между сыновьями принадлежавшую ему землю, он пожелал выделить часть и Христу Спасителю, рожденному преестественно и нетленно от Пречистой

Девы Марии. Братья воспротивились этому, и только старший из них, Иаков, принял Христа Иисуса в совместное владение своей долей и за это был назван братом Господним. Позднее Иуда поверил во Христа Спасителя как ожидаемого Мессию, всем сердцем обратился к Нему и был избран Им в число ближайших 12-ти учеников. Но, помня свой грех, апостол Иуда считал себя недостойным называться братом Божиим и в своем Соборном Послании именуется лишь братом Иакова.

Святой апостол Иуда имел и другие имена: евангелист Матфей называет его «Леввеем, прозванным Фаддеем» (Мф. 10, 3), святой евангелист Марк тоже называет его Фаддеем (Мк. 3, 18), а в Деяниях святых апостолов он упоминается под именем Варсавы (Деян. 15, 22). В то время это было в обычае.

По Вознесении Господа Иисуса Христа апостол Иуда отправился с проповедью Евангелия. Он распространял веру во Христа сначала в Иудее, Галилее, Самарии и Идумее, а затем – в странах Аравии, Сирии и Месопотамии и, наконец, пришел в город Эдесею. Здесь он завершил то, что не было закончено его предшественником, апостолом из числа 70-ти, Фаддеем. Сохранилось известие, что святой апостол Иуда ходил с проповедью в Персию и оттуда написал на греческом языке свое Соборное Послание, в кратких словах которого заключено много глубоких истин. Оно содержит догматическое учение о Святой Троице, о воплощении Господа Иисуса Христа, о различии Ангелов добрых и злых, о будущем Страшном Суде. В нравственном отношении апостол убеждает верующих беречь себя от плотской нечистоты, быть исправными в своих должностях, молитве, вере и любви, заблудших обращать на путь спасения, охранять себя от учений еретиков. Апостол Иуда учит, что недостаточно только веры во Христа, необходимы еще и добрые дела, свойственные христианскому учению.

Святой апостол Иуда мученически скончался около 80-го года в Армении, в городе Арате, где он был распят на кресте и пронзен стрелами.